

## Im Lift steche geblieb

Doneilich sin ich im Lift steche geblieb. Des heescht, der Fahrstuhl hat ofmol e Rucker gemacht un ich sin verschrock un han nit gleich gewisst, was ich mache soll. Doch schnell sin ich zu mer kumm, han uf de Notfallknopp gedrickt un schun is der Lift wieder angfahr.

Un es is mer ingfall, wie des in de 80er Johre war. Selmols han mer noch e uraltes Gsetll vun eem Lift ghat. Un weil so oft de elektrische Strom abgestellt gin is, sin mer treppauf un treppab. Es war oft schwierig, weil mer hat Zeckre ghat mit de Einkäufe, mer hat kleeni Kinner ghat, die mer im Arm nuf oder nuner traan hat misse. Doch selmols war ich um villes jinger. Doch es is efters vorkumm, dass de Strom abgestellt gin is un mer war grad im Lift. Zwischer zwaa Stockwerke. Dorte hat mer dann in dem Lift ausharre misse, bis de Strom wieder angang is un mer weiterfahre hat kenne.

Es war an eem Herbschttach geger owet, es is frieh dunkel gin. Ich war grad derbei, es Nachtesse zu richte. Do geht ufmol de Strom aus. Mir ware jo gericht for solchi Situatione un han e Petroleumlampe, a e Battterielicht un natierlich Kerze ghat. Ufmol heer ich e Bumbre un jemand ruft jämmerlich: „Holt mich do raus! Ich verstick!“ Mir is die Stimm bekannt vorkumm, schnell naus ins Stiegenhaus, dorte war a stockdunkl. Mit der Taschenlampen sin ich geger de Lift un wieder verzweifelt: „Schnell.... Ich hal des nimi aus“! Jetz war ich sicher, de Pheder, e Verwandter vun mir, is im Lift steche geblieb. Ich ruf, er soll sich gedulde, ich wer Hilf schaffe. Die Nochberschleit sin vun dem Kumedi a schun rewellisch gin un rauskumm, eene Nochber is je nuner uf de Treppe, mit eem Kichehockl ausgerischt, hat am siewete Stock dann mit eem Schrauwezieher an dere Lifttier rum gewurschtelt un die Tier ufkriet. Ich war dereweil ach schun dort un mir han des Hockl newer die Lifttier gstellt, doch de Pheder hätt jetz runnerhupse misse uf des Hockl. Er hat nor jomre kenne, dass er derzu ke Kurasch hat. Weil die Ängschter awer groß war, hat er sich doch runerhelfe gelosst, is ufm Hockl geland, mir han em schnell e Stampf Raki ingschenkt, er war blaich wie Kreid. Er hat nor noch gemurmelt: „Nie wieder, nie wieder...“!

Un so wars dann ach. Nie wieder is er in e Lift ningang. Nitemol dann, wie er mit seiner Familie uf Deitschland gezoo is un dort in eener Blockwohnung ufm fünfte Stock gewohnt hat. Immer nor treppauf.... treppab.